



**Inatsisartunut ilaasortaq
Karl-Kristian Kruse
Siumut**

Allakkat ulluat: 30-01-2020
Suliap nr. 2020 - 1482
P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

**Utoqqalinersiuteqalernissamut ukiut appartinneqarnissaat pillugu §37
naapertorlugu apeqquteqaammut nr. 2020-012-imut akissut**

Utoqqalinersiuteqalernissamut ukiut appartinneqarnissaat pillugu apeqquteqarputit.


**1) 2021-imi pisortanit utoqqalinersiuteqarsinnaanerup 67-inut qaffannagu 66-
iniitsiinnarnissaa qanoq inuiaqatigiinnut aningaasaqarnikkut kinguneqassava?**

Naliliisoqarpoq 2021-mi utoqqalinersiuteqalernissamut ukiut 67-inut qaffannginnissaat ukiumut Nunap Karsianut 35 mio. koruunit missaannik akeqartussaasoq. Aningaasartuutissani taakkunani ilaapput utoqqalinersiutinut aningaasartuutaanerusussat aammalu suliffeqartunit akileraarutitigut isertitakinnerunissaq. Aningaasartat taakkua innuttaasut amerliartornerat, inuit 66-inik ukiullit amerlanerulernerannik kinguneqartussa, pissutigalugu 2030-mi 50 mio. koruunit missaannut qaffassasut naliliisoqarpoq¹. Tamatuma taamaalilluni malitsigissavaa piffissaq ungasinnerusumi pisortat aningaasaataannik attassiinnarnissamut ajornartorsiutaasoq, isertitat aningaasartuutillu assingiinnngippallaalernerat aningaasanik amerlaqataannik ajornerulersinneqartussaavoq. Tamatuma saniatigut isumalluutit siunertamut tassunga atorpeqartut, suliap pissusissamisoornerani suliniuteqarnernut allanut, pisortat aningaasaqarneranni piffissami ungasinnerusumi oqimaaqatigiissitsinissamik qulakkeerinneqataasussanut, taamaallaat atorneqarsinnaassanngillat. Tassunga atatillugu assersuutigalugu taaneqarsinnaapput ilinniartitaanermut, attaveqatigiinnermut, isumaginninnermut suliassaqarfimmi suliniuteqarnernut aammalu suliffissaqartitsisarnerup akulikinnerulernissaanut suliniutinut aningaasaliinerit. Taamaalilluni naliliisoqarpoq ungasissumut attassisinnaaneq, aningaasaqarnikkut imminut napatissinnaanissamut pisariaqartoq, annertuumik sunnernerlunneqartussaasoq.

Matuma siuliani taaneqartunut tapiliullugu utoqqalinersiuteqalernissamut ukiut allanngortinneqarpata, innuttaasut katitigaaneranni pilersuisussanut agguaaneq

¹ Naatsorsuinerit 2018-imeersut akileraarusiinnermut paasissutissat nalunaarsukkat tunngavigalugit aammalu 65-inik ukiullit, 66-inik ukiullit aammalu 67-inik ukiullit peqqissusaat assigiipajaaginnassasoq naatsorsuutigalugu, suliarineqarput.


allanngortinneqartussaavoq. Pilersuisussanut agguaa neq, inuit inuussutissarsiorsinnaasut imminnut pilersornissamik saniatigut inuit qassit pilersortussaanaaraat, uuttuutaasarpoq. Periarfissatut ilusilianut apeqqutigineqartunut pilersuisussanut agguaa neq, ilusiliami matuma kingulianiittumi takussutissiarineqarpoq.



Takuneqarsinnaasutut utoqqalinersiuteqalernissamut ukiut 67-inut qaffanneqanngippata, inuk inuussutissarsiortoq ataaseq sulinermini pilersuinermut oqimaannerusumik kivitseqataasussaassaaq. Taamaalilluni isumalluutininik inuusuttuniit utoqqarnut nuussisoqartussaavoq.

2) 2021-imi pisortanit utoqqalinersiuteqarsinnaanerup 67-inut qaffannagu 65-inut appartinneqarsinnaanerup qanoq inuiaqatigiinnut aningaasaqarnikkut kinguneqassava?

Naliliisoqarpoq 2021-mi utoqqalinersiuteqalernissamut ukiut 65-inut appartinneqarnerat Nunatta Karsianut ukiumut 70 mio. koruunit missaanni akeqartussaasoq. Aningaasartuutini taakkunani ilaatinneqarput utoqqalinersiutinut aningaasartuuteqarnerulerneq aammalu suliffeqartunit akileraarutitigut isertitakinnerulerneq. Aningaasartat taakkua 2030-mi 100 mio. koruunit missaannut qaffassasut naliliisoqarpoq, tassami inuit 65-inik aamma 66-inik ukiullit amerlanerulertussaammata. Tamanna grafimi matuma ataaniittumi takutinneqarpoq. Piffissaq ungasinnerusumut attassisinnaanermut sunniinerit nassuiarneqartut, kiisalu aningaasaqarnikkut immiut napatinnerulernissaq pillugu anguniagaqarneq, apeqqummut 1-imut akissutip ataani nassuiarneqartut aamma pisumi matumani atuuttussaapput. Taamaattoq suliap pissusissamisoornerani piffissami ungasinnerusumut attassisinnaanerup sunnerlunneqarnera suli annertunerusussaavoq. Pilersuisussanut agguaanermi ineriartorneq naatsorsuutigineqartoq, taamaaqataanik apeqqutip 1-ip ataani ilusiliami takussutissiarineqarpoq.



Inussiarnersumik inuulluaqqusillunga

Vittus Qujaukitsoq
Vittus Qujaukitsoq